

4. marts 2006

UKIU 2006/19

**Naartunermi, erninermi kiisalu meerarsiartaarnermi sulinnigiffeqartarneq
ullormusiaqartitaasarnerlu pillugit inatsisartut peqqussutaata
allanngortinneqarnissaanut siunnersuut**

pillugu

Inatsisartut Ilaqutariinnermut Ataatsimiititaliaata

ISUMALIUTISSIISSUTAA

siunnersuutip aapaassaaneernejarnerani saqqummiunneqartoq

Inatsisartut Ilaqutariinnermut Ataatsimiititaliaat suliarinninnermini ukuningga
inuttaqarpoq:

Inatsisartunut ilaasortaq Agathe Fontain , IA (siulittaasoq)
Inatsisartunut ilaasortaq Thomas Kristensen, Atassut
Inatsisartunut ilaasortaq Agnethe Davidsen, Siumut
Inatsisartunut ilaasortaq Tommy Marq, Siumut
Inatsisartunut ilaasortaq Esmar Bergstrøm, Demokraatit

Siunnersuutip siullermeernejarnera toqqammavigalugu peqqussutissatut siunnersuut
kiisalu siunnersuummut oqaaseqaatit Inatsisartut Ilaqutariinnermut
Ataatsimiititaliaata misissuataarpai.

Ataatsimiititaliap isumaliutersuutai

Ernereermermi sulinnigiffeqartarnerup sap. ak. 11-nut sivitsorneqarnissaa
Peqqussutissatut siunnersuummi siunnerfigineqarpoq. Suliniut siullermeerinninnermi
partiit oqaaseqartitaasa tamakkerlutik ilassilluarpaat. Ilaqutariit meerartallit
naartunermi, erninermi kiisalu meerarsiartaarnermi atugarisaasa nunallu avannarliit
qaffasissusaanut qanillattornissaanut atasumik uagutsinnut
assersuussassaqaarsinnaanissarput kissaatigalugu inuulluarnerunissamat
pitsannngorsaataasussaavoq. Inuiaqatigiit peqqissumik patajaatsumillu
ineriartortinneqassappata ilaqutariiususeq toqqammaviliisuusarmat

anaanangortussanut ilaqtariinnullu inuusunnerusunut toqqissisimasumik atugassaqartitsinissaq pingaartuusoq Ataatsimiititaliap isumaqatigaa.

Peqqussutissatut siunnersuutip inatsisartut siullermeerinninneranni tapersorneqarluarnera eqqarsaatigalugu, inatsisartut oqallinneranni immikkut maluginiarneqarsimasut eqqarsaatigalugit ajornartorsiutit ataasiakkaat Ataatsimiititaliap oqaaseqarfigissallugit aaliangerpaa.

1) Naligiissitanissamik isiginnineq.

Ernereermermi sulinnigiffeqartarnerup sivitsorneqarnerani inatsisip ilaqtariinnut suliffissaqartitsiniarnermilu politikki kisimik attorneqarneq ajorput naligiissitaanissamilli politikki aammattaaq minnerunngitsumik attorneqartartoq inatsisartut oqallinneranni arlalinnit tikkuarneqarpoq. Tamatumunnga patsisaavoq sulinnigiffeqartarnerup sivitsorneqarnerata ataataasut meeqqap paaqqutarinissaanut nutaanik pitsanngoriaatinillu periarfissiisussaammat taamatuttaarlu arnat inuusunnerusut suliffissaqartitsiniarnermi inissisimanerannut kinguneqartussamik malitseqartussaammat. Taamaattumik Naligiissitaanermut Ataatsimiititaliap tusarniaanermi oqaaseqarnissaa periarfissinneqarsimanngimmat Ataatsimiititaliamit ajuusaarnartutut isigineqarpoq. Tamanna siunissami pisalissaaq.

Peqqussutissatut siunnersuummi ilusiliinermermi sulinnigiffeqartarnerup sivitsorneqarnerata ataataasumut anaanaasumullu pitsaanerulersitsisussaanaera Ataatsimiititaliap iluarisamaarlugu ilaatigut maluginiarpaa.

Sulinnigiffeqarnermi piffissap agguataarneqarnissaa sioqqullugu angajoqqaat assigiinnigitsunik arlalissuarnik aaliangiussinnginnernerminni eqqarsaasersuuteqartariaqarput. Meeqqap milutsinneqartarnissaannut tunngasut suliffimmilu pissutsit kiisalu ilaqtariit aningaasaqarniarnerat pillugu eqqarsaatersuutit uani apeqqummi aamma ilaapput. Aaliangiinermisaaq ilaqtariussutsitigut ileqqut suaiaassutsikkullu pissutsit ilisimaneqartut nalilersueqataasussaapput. Tamanna tunngavigalugu siunnersuutip siullermeerneqarnerani oqaatigineqartut, ataataasut ilaasa ilaatigut eqqarssatigilluagaanngitsumik sulinnigiffeqarnissap anaanaasumut tunniussinnaammasuk aarleqqutigineqartoq Ilaqtariinnermut Ataatsimiititaliamit isumaqatigineqarpoq. Taamaalillutik taakku ataataasut angajoqqaatut akisussaassuseqarnertik suusupagilertussaavaat, ajornerpaarli tassaavoq namminneq meeqqamillu pingaarutilinnik pissarsiffiulluartunillu misigisaqarnissartik pinngitsoortissinnaagamikku.

Taamaattumik siunissami sulinnigiffeqartarnermi inatsisit pitsanngorsarneqassatillugit sulinnigiffeqartarnerup siviussusaata ilaa *ataataasup sulinnigiffeqartarninngorlugu* ilusilerneqarnissaa eqqarsaatigineqartariaqartoq Ilaqtariinnermut Ataatsimiititaliap kaammattuutigissavaa, ima paasillugu sulinnigiffeqartarnerup siviussusaa uisumut taamaallaat atuutsinneqartassasoq anaasaasup imaluunniit angajoqqaajusut sulinnigiffeqarnerata sivitsorneqarneranut atatillugu atorineqanngippat atorunnaarsinneqarsinnaalluni.

Naartunermut maleruagassat nutaat pillugit Ilaqutariinnermut Naalackersuisoqarfiup innuttanut paasisitsiniaanerminut atatillugu, tassungalu ilanngullugu innutani isummertarnerup anguniagaqarfiusumik suliaralugu naartunermut atasumik aningaasaqarniarnerup sukumiisumik paasisutiissutiginnissaa Ilaqutariinnermut Ataatsimiititaliap ilanngullugu kaammattuutiginnissavaa. Taamaalilluni paasisutissanik mappersagaaqqanik suliaqarnermi kiisalu radiokkut imaluunniit tv-kkut ilanngutillaakkani ataataasoq nutaaliaasoq pingaartillugu suliaqarnissaq kiisalu angajoqqaat akornanni assigiimmik akisussaaffiup agguataarneqarnissaanut pitsaangorsaaniarneq periarfissineqassappat pissusissamisuuqinnassaaq. Taamaalilluni peqqussutip atuutsilerneqarnera isummeriaatariaatsit sunnerneqarnissaannut pingaarutilimmik, ataatanngorlaanuinnaanngitsoq taamatulli sulisitsisunut utoqqartatsinnullu periarfissiissaaq.

2) Peqqussutip atuutilernerani malittarisasaat.

Siunnersuutip siullermeerneqarnerani Siumup oqaaseqartartartuaniit uparuarneqarpoq peqqussutissatut siunnersuummi § 2-mut oqaaseqaatit aalajangersakkap atuutilernissaanut tunngasoq qularnartoqartoq. Taamaattoq atuutilersitsinissamut aalajangersakkap oqaasertaasa ersarissumik aaliangersarpaat inatsisip atortinneqarnerani piunasaqaatit tunngavissaq tassaasoq, ulloq 1. juli 2006-imi atortuulersitsineq sioqqullugu kingusinnerusukkulluunniit meeraq inuusimassasoq siunnersuummi ersarissumik naqissuserneqarpoq. Paarlattuanik inatsisissatut siunnersuummut oqaaseqaatini maluruagassat atuuttut atuutinngitsulluunniit malillugit sulinnigiffeqarneq aallartereersimagaluarpalluunniit saniatigut piffissaq erniffiusoq sunniivigineqarsinnasoq siunnersuutip kalaallisoortaanittunit ilimartoqartinneqarpoq.

Inatsisissatut siunnersuummi oqaaseqaatit pillugit Naalackersuisunut ilaasortaq ersarissaalersaartoq Naalackersuisunut ilaasortamik ataatsimeeqateqarnermi Ilaqutariinnermut Ataatsimiititaliap paasivaa, taamaalilluni oqaaseqaatit nalornisoornissamik kinguneqartitsissanngimmata.

Peqqussutip oqaasertaata inatsisitigut inissisimanagera aalajangiisuusariaqartoq Ilaqutariinnermut Ataatsimiititaliap isumaqarpoq. Aammattaaq erninnermi malittarisassat nutaanngitsut nutaalluunniit atorneqassanersut piffissami meeqqap inunngornerami aalajangiunneqarnissaannut naleqquttuunersut piunasaqaatitullu naammaginarsut aalajangerneqartariaqartoq ataatsimiititaliap isumaqarpoq.

3) Erninnermi aningaasaateqarfimmik pilersitsinissaq pillugu apeqqu.

Siunnersuutip siullermeerneqarneranut atatillugu erninnermi aningaasartuutitut attuumassuteqartunut matussutissiiffiusussamik aningaasaateqarfimmik pilersitsinissaq Atassutip oqaaseqartartuanit saqqummiunneqarpoq.

Tamatumunnga atatillugu erninnermi aningaasaateqarfimmik pilersitsinissamut periarfissap erninnermi malittarisassat siunissami patajaallisarneqarnissaannik

kissaateqarneq matumani eqqarsaatersuutigineqartariaqartoq Ilaqutariinnermut Ataatsimiititaliamit maluginiarneqarpoq. Erninermi aningaasateqarfimmik pilersitsinissaq periarfissaqarneris Naalakkersuisut piaarnerpaamik misissorlugu aallartissagaat Ilaqutariinnermut Ataatsimiititalimit kaamattuutigineqarpoq.

Ilaqutariinnermut Ataatsimiititaliap inassuteqaataa.

Siuliani oqaaseqaaseqaatit tunngavigalugit aappasaaneerinninnermi peqqussutissatut siunnersuut saqqummiunneqartoq ilusimisut iluseqartoq Inatsisartut akuersissutigissagaat ataatsimiititaliap **isumaqatigiittup** inassutigaa.

Taama oqaaseqarluni Inatsisartut Ilaqutariinnermut Ataatsimiititaliaata siunnersuut aappasaaniigassanngortippaa.

Agathe Fontain
Siulittaasoq

Thomas Kristensen

Agnethe Davidsen

Tommy Marq

Esmar Bergstrøm